



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3

WTC Final: Ravindra Jadeja-i 'Team jersey' tasen sayu

Mizoram nung senotsü agi timtemer: CM Zoramthanga



VOL. XVIII NO. 225 (ADOK 225) DIMAPUR

AMUNGNÜ (SUNDAY)

MONUPII (MAY) 30, 2021

₹ 5.00

IPS Robin Hibu-i NE nunger bendanga amshiba anendaktsütsü atema shisa lemsar

Guwahati, May 29, 2021 (Agencies): Additional Director General of Police, Delhi Police aser Special Commissioner Robin Hibu, IPS-i Northeast India nunger kin nung ajemdaker mezümgmeshiba anentsü atema inyakyim kar lemsatepoo.

"Northeast nungi lanur 2,700 shi ka Delhi police nung aniokogo aser parnok dang NCR nung northeast nunger dak sendakba maparen atema inyaktüsü tetuyuba agütsüogo. New Delhi nung kin nung ajemdaker mezümgmeshiba inyakyim samaa odar," ta Robin Hibu-i ashi.

Linük yimtiba nung Northeast nunger anema inyaksangshiba kar ataloker saka lockdown mapang Delhi nung alirtemi pa den yaritepa Northeast nunger nem teyari agütsüogo ta paisa ashi.

India kübok tesem aika nung kin nung ajemdaker Northeast Indians mezümgmeshi aser bendanga amshiba atema jembidang "Nisung ajakibo bendanga mamshir, saka auto wallah aser rickshaw wallah nunger dena loktiliba nung teküpok jenjang nung alirtemi tereprangtsü nung ajemdaker bendanga amshir. Ni uniform masem dangbo Korean mesüra Chinese ta ajar. Iba tangatetba ya agiendaktsütsü atema asenok teinyaktüsü aika lir" ta Robin Hibu-i ashi.

Bezbaruah Committee-i NCERT kakettek nung Northeast indang chapters densemstsü ashiba ama India sorkari mapa inyakdar, ta paisa ashi.

Bezbaruah Committee-i ashiba teinyaktütem state ajak nung benoktsüla. Kin nung

ajemdaker nisung bendanga amshiba anendaktsütsü atema Northeast aser India kübok tanga tesemtem tsüingda sobaliba ka akümtsüla, ta Robin-isa metetdaktüsü.

"Northeast-i tourist tem arutsü ajungmesotsü atema sorkartemi air connectivity, road, railway amala infrastructure renlokba nung temolung agütsütsüla. Ano, media aser tanga sabangtem nung Northeast nung Kamakhya, Cherrapunjee amala otsü tajungtem indang sangdongtsüla" ta paisa ashi.

"Northeast ajungkettüsü atema asenoki ambassador tem nüngdaker" ta paisa shise.

Paisa yimti balala nung Northeast India nunger lanur aika soseta asüba indang tebilemstsü lemsatepdang "parnokki taküm jenjang tajungba akümtsü teimla yur arur, saka ibaji metongteter. Yimti balala nung mapa inyaktüsü arur 90% shi ka unorganized sector nung inyaker aser iba jagi parnok dak tenük meyokteter" ta ashi.

"Tesem tasen ka nung timtemdang teyarir tajung maliba ajanga nisung kar soseta asür. Ano, lanur aika temeim tsütsü timtem ajurudang soseter, anungji ibala tia ajurudang kinungertem aser lennirtem dang nungi teyari meshitsüla," ta paisa shisem.

Robin Hibu-isa NGO, Helping Hands ajanga northeast nungertem yaria arur.

Pa nem Samajik Ratna Puraskar, National Gaurav Award, Angel Award, Best IPS Officer Award (2017), Social Work for Minorities Award, Peacemaker Bravery Award amala sempet tajung aika agütsüogo.

Dimapur nung ODD-EVEN system maneni alitsü

Dimapur, May 29, 2021 (TYO): Dimapur district nung June 11, 2021 tashi garitem ODD-EVEN system nung senzütsü, ta Commisioner of Police, Rhothihu Tetso, IPS-i tanü nenshia metetdaktüsügo.

Taoba mapang tetuyuba agüja alibatem magieni inyaka aotsü, ta paisa ashi.

Nagaland sorkari sensakertem atema meblemstsür: NPCC

Dimapur, May 29, 2021 (TYO): Nagaland state sorkari sensakertem yaritsü mapa kecha meinyaki lockdown alitsü sangdongba aitsür ta Nagaland Pradesh Congress Committee (NPCC)-i ashi.

"Nisungtem tang Corona virus aser yatzüraba tsüingda kangshir" ta Congress-i metetdaktüsü.

Sorkari sensakertem yaritsü atema mapa kecha meinyakba aitsür. Parnok nem teyari agütsütsü osang kecha mesangdongi lockdown atsülangba ajanga timtem tulu bentsür arutsü, ta parnokisa ashi.

Nagaland sorkari June 11, 2021 tashi total lockdown alitsü osang metetdaktüsügo. Iba total lockdown ya May 14, 2021 nungi tenzüka liasü aser anaben tashi atsülangogo. June 11, 2021 tashi mapang atsülangba züingsema total lockdown ya anogo 28 tashi alitsü.

COVID-19 Nagaland: Nisung 156 dak putet aser kasa taneptsü angu; 7 asü

Kohima, May 29, 2021 (TYO): Honibarnü Nagaland nung nisung 156 dak COVID-19 aliba putet aser parnok züingsema nisung ajak agi 21,371 kümogo. Külen, tanü COVID-19 agi shirangertema nisung 156 tashi taneptsü angu.

"Tanü nisung 156 dak COVID-19 putet. Parnokki Kohima nung 76, Dimapur nung 35, Phek nung 15, Kiphire nung 9, Longleng o Zunheboto nung tenetnet (7), Mokochung nung 4 aser Mon, Peren o Wokha nung kaka (1) lir" ta Health & Family Welfare Minister, S Pangnyu Phom-i metetdaktüsü.

"Maneni, tanü COVID-19 agi shiranger nisung 156 taneptsü angu. Parnokki Dimapur nung 86,

Mokokchung o Phek nung tertrokrok (16), Longleng nung 15, Kohima nung 10, Zunheboto nung 8, Peren nung 3 aser Mon nung 2 lir" ta paisa ashi.

Nisung 21,371 rongnungi 15,414 taneptsü nguogo aser tang 4,982 anepaludar, ta paisa ashi.

Nagaland nung COVID-19 nungi taneptsü angurji 71.92% lir.

Honibarnü COVID-19 puteta alir nisung 7 asüba züingsema tasür ajak agi 350 kümogo saka parnok 12 bo tanga tashidak ajanga asü, ta Minister Pangnyu-isa ashi.

Nagaland nung COVID-19 alitsü akok ta temolung melemi bilemba sample 1,89,650 tendangogo. RT-PCR ajanga 88,875, TrueNat ajanga 54,923

aser Rapid Antigen Test ajanga 45,852 tendang.

"Tanü tashi nung Nagaland nung nisung 2,14,464 nem COVID-19 vaccine indang dose 2,68,591 agütsüogo" ta State Immunization Officer Dr Ritu Thurr-ia ashi.

"Vaccine agirtemji frontline workers 58,330, healthcare workers 15,482, arishi küm 45 tempur 1,21,924 aser arishi küm 18 nungi 44 tsüingda alir 18,728 lir" ta paisa ashi.

"Vaccine agirtem rongnung parnok 54,127-i dose anaprong agiogo. Parnokki frontline workers 27,970, healthcare workers 10,180 aser arishi küm 45 ser tempur 15,977" ta Dr Thurr-isa metetdaktüsü.

Tanur reshikangshiba atema apuani ka apu

Dimapur, May 28, 2021 (TYO): Hokolbarnü Dimapur kübok Sematilla nung tanur dak tashiyim mapa inyakba atema police-i apuani ka apu.

Tenaji arishi küm 46 tain Lipokchuba aser pa kinungtsü Bendangsangla (45) na lir. Sub-Urban Police Station nung FIR ka benokba nung ajemdaker tena apu, ta police-i metetdaktüsü.

Tena kidang mapa inyaktüsü atema ayuba tanubosangji arishi küm 10 dang lir, ta CHILDLINE Dimapur nung ketdangsür kati ashi.

"Tanubosang tebuji süogo aser pa adianu 6 lir. Tetsü la memesütetba agi yaküm apuani dang Rs 20,000 agi ayok" ta laisa ashi.

Apuani nati anogoshia tanur dak azükba osangji kiyongertemi Child Helpline Number 1098 nung phone süa ashi.

"Tanubosangji tekolak nungi tenzüker tetsüing tashi aser temezüing dena yirua lir. Pa nija mozü ki ka nung anepaludar" ta CHILDLINE Dimapur ketdangsürisa shisem.

Doctor temi tanubosangji anaemia agia timtemer ama temolung malemba shiogo, ta laisa ashi.

"District Child Welfare Committee (CWC), District Child Protection Officer aser CHILDLINE Dimapur-i tanubosang mozü kidang anepaluba sen agütsütsü. Onoki tetsüji bushidar" ta ketdangsürisa metetdaktüsü.

Tanubosang temang tajungba akümba sülen Child Care Institute ka nung ayutsü aser iba sülen CWC-i kechi inyaktüsü'ar telemetba agitsü.

TELOK BALALAI AITSÜR:

Dimapur Ao Lanur Telongjem (DALT), Ao Kaketshir Mungdang (AKM), Dimapur Kangtsung Senso Telongjem (DKST) aser Dimapur Eastern Nagaland Students' Union (DENSU)-i sangdong balala nung iba inyakyim khukhua aitsüba metetdaktüsügo.

"Shia meteterem aliba loktiliba ka nung ibala mapa inyakerem alidak mali. Ozüing amertemi tekaratiba nung aibelenertem merenshitsü akhanger. Sub Urban Police Station-i mapang shitak nung teinyaktüsü inyakba atema tenüingsang agütsür" ta Dimapur Ao Lanur Telongjem (DALT)-i metetdaktüsü.

"Onok sasep nung ibala mapa inyakerem aliba atema kanga nüma matanger. Ozüingi melaba ama inyaka aotsü atema nisung shingaia aibelenertem bail nung magizüksü metetdaktüsü" ta DALT-isa ashi.

"Maneni, tanubosang tekaratiba nung taneptsü ngur par tsürabur den külemi liyonga aotsü atema bilemstsür" ta parnokisa ashi.

Ao Kaketshir Mungdang (AKM)-ia tanga sangdong ka nung iba inyakyim khukhua aitsüba metetdaktüsügo.

"Ozüing amertemi tekaraba nung aibelenertem merenshitsüla aser temeten agütsütsüla. Talisa, kidangertem, Child Help Line aser District Child Welfare Committee, Dimapur-i mapang shitak nung tanur kümzükba atema tenüingsang agütsür" ta Tir Nungdokyanger aser Tongti Tezülur Nekmi Longkumer nati ashi.

Dimapur Kangtsung Senso Telongjem (DKST)-ia sangdong ka nung Sematilla, Dimapur nung

alir apuani Lipokchuba aser Bendangnaro (Bendangsangla) nati tanur tebur ka reshikangshiba khukhua aitsüba metetdaktüsügo.

"Rongsennuken'er jabaso Lipokchuba ya DKST nung züingsema mali aser tebuttsü Bendangnaro (Bendangsangla) ya Nepali tsür lir" ta Tir R. Atuba Jamir aser Tezülur Alem Pongener nati sangdong nung ashi.

Tenati arishi küm 9 tain tanur ka dak taochi melii reshikangshiba khukhua aitsür aser iba ya meimchir atema lendong tulu ka lir, ta DKST-i ashi.

Sub Urban Police station, Dimapur nung ketdangsürtemi mapang shitak nung mapa inyakba atema pelar. Okatsürtemi tai tonglokja aliba apuani na bail nung chiochtsü memerangtsüla aser DKST-ia sobaliba ozüing nung ajemdaker tena merenshitsü, ta mendenpurtemisa ashi.

"Ozüing amertemi tai tonglokja alirtem ozüing tapetsü agi merenshitsü mepishir aser tanubosang temang tajungba kümer par kibong den longjemtsü sarasademtsür" ta DKST-isa metetdaktüsü.

Maneni, Dimapur Eastern Nagaland Students' Union (DENSU)-ia apuani nati tsümar tanur ka dak tashiyim agi mapa inyakba khukhua aitsüba metetdaktüsügo.

Arishi küm 9 tain tanur ka dak yamai taochi maliba mapa inyakba atema aoksar aser tangatetba shitak alir ajaki aitsütsüla, ta DENSU-i ashi.

Sub-Urban Police station-i mapang shitak nung mapa inyakba atema pelar aser ozüing amertemi tanubosang nem temeten agütsütsü mepishir, ta parnokisa ashi.

Covid-19 tashidak nokdangtsü atema senso shia teinyaktüsü asem :

Tangar alidak teti teni tebang nembang mask temerük agiang;

Tangar den tsüktepa tenokdak aser temen;

Teti sapon agi teka metsükang.

Nagaland anema contempt case benoktsü akok: Assam Special DGP



Assam Special DGP GP Singh-i Hokulbarnü Mariani nung aliba Assam-Nagaland arrtsü semdangba mapang tangokba noksa ka yangi angur.

Guwahati, Monupii/May 29 (Agencies): Assam Special DGP GP Singh-i Hokulbarnü Mariani nung Assam-Nagaland arrtsü semdangba sülen taoba mapang Supreme Court ajanga totuyuba agütsüba nung aibelenba atema Nagaland anema contempt case benoktsü akok, ta ashi.

Assam-Nagaland arrtsü indang ken o ya linük nung tematiba court nung benoka lir.

Brehostibarnü arrtsü alema orr Naga nung mejangjaba nisungtemi Mariani Congress MLA Rupjyoti Kurmi dak injang khaloktsüba sülen Assam Chief Minister-i totuyuba agütsüba nung ajemdaker Singh-i Balijan Pahar nung aliba Assam-Nagaland arrtsü ya semdanga liasü.

Naga nungertemi pa indang constituency nung ali rakzüker ta osang aruba jangjatsü atema Kurmi ya Assam nung New Sonowal border outpost nungi kilometer asem pilar aliba Balijan Pahar yagi oa liasü.

Ajisüaka parnok iba tesem ya atongba mapang injang khaloktsüba ajanga MLA Kurmi den osangbener, pa indang PSO ana aser Assam police tem jena aotsüsa akum.

GP Singh-i ashiba agi, Jorhat

indang superintendent of police aser deputy commissioner dang Dissoi Valley Reserve Valley area indang GPS location, noksa aser video bendena sorkar nem ghonda 48 tsüngta agütsütsü totuyuba agütsüo, kong ali rakzüker ta tai tongloktsüba ataloka lir.

Osang nungya Supreme Court totuyuba nung koma aibelenba inyaksangshi, item ajunga adentsüla, ta pai ashi.

Osang anguba sülen court tematiba nung contempt case benoktsü atema sorkari law department den tebilemba lemsateptsü.

Dissoi valley Reserve forest tebilemstü indang jembia angateteptsü atema Hombarnü tashinung DC-SP jenjang nung jembitsü molungtepogo, ta pai ashi.

Pai DIG, Jorhat SP aser DC den külemi iba tesem semdang aser Nagaland IG (Border), Nagaland Border magistrate aser Mokokchung district administration den sensaksem kaogo, ta Singh-isa ashi.

Ali ya atsünga arur alitsü akok, kechiaser Mariani nungi arem anüker temi anogo ana tejakdang süngjang yika aliba azüngtetsü merang, ta pai ashi.

Mariani MLA dak akhaba

aser Mariani police station nung ken o benoka aliba indang athishia jembiba mapang, pai Jorhat SP dang Mokokchung SP dangi Kurmi dak injang khaloktsüdang amshiba prangbong ya license ali asü mali jangjatsü, aibelener pua Jorhat police nem agütsütsü atema züluang ta totuyuba agütsüo, ta Singh-i ashi.

Nagaland-i Assam li atsünga aruba atema state sorkari kechia meshitetba mechi Hokulbar nikongdang nungi tenzüka Mariani Congress MLA Rupjyoti Kurmi ya Assam-Nagaland arrtsü anasa Bhabanipur nung achi-ajem mesüi longkak ait tenzüko.

Dissoi Valley Reserve Forest shilem tuluka Naga nungeri chidoker somomu aser kozüdong tema yangji ki ka süa lir, ta osang ajanga ashir.

Dissoi Reserve Forest, Dissoi Valley Reserve Forest aser Tiru Hills Reserve Forest ya Assam-Nagaland arrtsü nung aliba arem lir.

"Ni, MLA kisüng masü saka Assam police aser osangbener dak injang khaloktsür ghonda 24 süyiaka Assam Police-i kecha mesütetba ya maksü lir," ta Kurmi-i ashi.

Assam Rifles-i Wapher yimtsüng merektetsü

Dimapur, Monupii/May 29 (TYO): Wapher, Community Health Officer, Rebek-i achaayanga 45 Assam Rifles, Shamator-i May 28 nü Wapher yimtsüng nung merekmeju sentong ka ayongzüka katsüo.

Merekmeju sentong kübok Sub-Centre, Wapher Baptist

Church premises, Police check post, Community Hall aser shishilembadak amala tongtibang tesem balala nung disinfectants raklokja merektetja liasü.

Assam Rifles-i yimtsüng nung alirtem ajangzükdaktsütsü atema sentong tajung

ayongzüka inyaktsüba atema Wapher Citizen Union tir, A.V. Thomas-i AR dang kanga pelaba lemsatep.

AR team ya Commandant, 45 AR, Col. Amit Thakur aser CMO, 45 AR Shamator, Jacob Lalmalsawm na lenisüba nung inyaksangshia liasü.



Rotaract Club Of Dimapur-i, May 18 nü nungi tenzüka tanü tashi Covid agi shirangertem aser nungdaka aliba purtem nem takok tashi teyari agütsütsü meranga arudar. Club-i tang tashi nung mozüki yipden 19 anepalutsüo, shiranger nem oxygen cylinder 19 agütsüo aser azü unit 33 anepalutsüba den chiyongtsü 214 ben agütsüo. Club-isa ambulances 4 anepalutsüo aser black fungus virus anepalutsü atema mozü 3 agütsüo.

Mon DC-i vaccine agitsüba inyakyim metetdaksü

Dimapur, Monupii/May 29 (TYO): DC Mon, Thavaseelan K, IAS-i sangdong ka ajanga May 28 nü Covid-19 dak sendakba osang ka metetdaksüo.

1. Vaccine agitsü atema atazükja aliba anogo vaccine magitetra, pa/la-i portal/app nung "Reschedule" tab nung nema tanga anogo ka nung vaccine agitsü atema anepalutetsü.
2. Vaccine agitsü atema appointment yanglur aliba

thitsür tanga anogo ka nung vaccine agitsü atema anogo melenshitetsü aser pei azüngba mapang apir anogo aser mapang shimtetsü.

3. Appointment yangluba sülen nüburtem nem vaccination centre, anogo aser mapang indang osang tejangja, SMS ka ajanga registered mobile number nung osang agütsütsü. Appointment slip-a download süa print sütettsü mesera pei smart phone nung yutetsü.

Peren District Hospital shibangtsür

Dimapur, Monupii/May 29 (TYO): Deputy Commissioner Peren, Sentiwapang Aier, NCS-i sangdong ka ajanga, COVID-19 tashidak keta alir potetba aser tashidak menatepa aoba nokdangtsü atema osang tejangja ka magütsü tashi May 28 nü nungi District Hospital, Peren shibangja ataba metetdaksüo.

DC-isa, nüburtem dang

shibangja aliba tesem temeket nung tashidak nungi jenboa alitsü atema kanga kümdanga i n y a k s a n g s h i t s ü metetdaksüo.

Maneni pai, tetuyuba agütsür aliba sülen manidakertem ajak Disaster Management Act, 2005 Section 51 nungi 60 aser IPC Section 188 dak ajemdaker tapet temerenshi agütsütsü, ta metetdaksüo.

Changtongya nung shisatokdenba senden ka amen

Dimapur, Monupii/May 29 (TYO): COVID-19 tashidak agi asüba nisung tasümgang indoktsü atema shisatokdenba senden ka May 27, 2021 nü Dobashi Customary Court, Changtongya Town nung mena liasü.

Iba senden nung SDO (C) Changtongya, Rorheu Peseyie menden liasü aser pai Sub-Division kübok yimtsüng ajunga nung Village Disaster Management Authority tanaben asendenshitsü totuyuba agütsü, kechiaser sorkari COVID-19 tashidak agi asür temang anepaluba aser ketdangtsüba nung VDMA shilem lir.

SOP nung aliba ama mera shidak agira, nisung tasümgang ka nungi COVID-19 menatepa aotsü mali, ta SMO, CHC Changtongya, Dr. Jungshi Aier-i ashi.

Pai COVID-19 tashidak agi

asüba nisung tasümgang anepalua indoktsü atema SOP rateta ashi.

MO, CHC Changtongya, Dr. Among ajanga iba senden nung COVID-19 tashidak agi asüba nisung aremdang süngden amshiyim indang jembia liasü.

SDO (C) ajanga nüburtem dang renemshia alitsü ayongzüka liasü. Paise senden nung adenertem dang nüburtemi COVID-19 tashidak agi asüba tasümgang ketdangtsüa indoktsü yimyatem angazükdaktsütsü ajungshia liasü.

Iba senden nung Sub-Division kübok yimtsüng ajunga nungi council chairman, pastor, all Ward Chairman Changtongya town, Watsu Unit President Changtongya town, student union Changtongya town aser O/C Thana nungertem dena liasü.

AR-i Covid awareness sentong ayongzüka katsü

Dimapur, Monupii/May 29 (TYO): HQ IGAR (North) tawabangba kübok Assam Rifles, Mokokchung Battalion-i May 28 nü, Assam kübok Naginjan Tea Estate aser Desai Tea Estate aser Mokokchung district kübok Saring aser Longchem yimtsüng nung COVID-19 aser Black Fungus dak sendakba nung tangazükba agütsüo.

Iba inyakyim ya Assam aser Nagaland kübok kinük nung aliba nüburtem nem wara indang tangazükba agütsütsü aser tashidak nungi jenboa alitsü atema kümküma lidaktsütsü

nükjidong nung ayongzüka inyakogo.

Sentong agiba mapang, face mask anana amshitsüba, sanitizer amshitsüba, merekmeju alitsüba aser lokti nung tetsüngda ita inyaksangshitsü atema tangazükba agütsü. Maneni nüburtem dang COVID dak sendakba nung tim inyakyimtem benshitsü aser COVID Vaccination Drive nung shilem agitsü ayongzüker.

Iba sentong tajung ayongzüka katsüba atema Assam aser Nagaland nung aliba nüburtemi AR dang kanga pelaba lemsatepogo.

PDSA-i asükhu lemsatep

Kohima, Monupii/May 29 (TYO): Phek District Sports Association (PDSA)-i sangdong ka ajanga, Chakhesang Youth Front (CYF) tatong tir Vetsurayi Tetseo asüba osang angazüka mang ayimba lemsatepogo. Vetsurayi Tetseo ya Pfutsero nung Honibarnü asü, shiba kanga nendaka inyakba aser bendanga

agütsüba lenir ka liasü, aser lokti atema pai akokba tashi tajungtiba inyaktsüo, ta kasa sangdong ajanga lemsatep.

Pa asüba ya lokti asoshi takoksa tulu, aser tulusang Tsüngremi asür kinungertem nem asükhu koktettsü atema anisüngzüker agüjang ta sarasademtsüba kasa sangdong ajanga lemsatep.

Mizoram nung senotsü agi timtemer: CM Zoramthanga



Zoramthanga (File photo)

Aizawl, May 29, 2021 (Agencies): Mizoram nung COVID-19 wara den African

Swine Fever (ASF) adokba ajanga senotsü tsütsü timtem ajurua lir, ta Chief Minister Zoramthanga-i metetdaksü.

COVID-19 wara adokba ajanga state rongsenkettsüing nung kongshiogo. State-i Centre nema tax shitak magütsüteter. 2020-2021 financial year nung Mizoram-i tax agütsütsü lezmükba Rs 1,500 crore kümogo, ta pai ashi.

"State-i Rs 150 crore tashi endokba ajanga khuret talila ajuru. State rongsenkettsüing jenjang mejungi akümiba ajanga

sorkari terenlok mapa tasentem meinyakteter" ta CM Zoramthanga-isa metetdaksü.

African Swine Fever (ASF) wara adokba, state kübok tesem balala nung morok mi lendong adokba aser Myanmar nungi nisung aika arua jenokba ajanga rongsenkettsüing nung kongshi, ta paisa ashi.

Mizoram nung COVID-19 agi shiranger nisung 2758 anepaludar. Nisung 11382 dak putetba nungi 8691 taneptsü nguogo aser COVID-19 ajanga nisung 36 süogo.

YouTuber Paras Singh dang History & Geography lesson sayur



Itanagar, May 29, 2021 (Agencies): Congress MLA Ninong aser Arunachal nunger

a n e m a j e m b i s a n g YouTuber Paras Singh nem police-i history lessons sayur ta o s a n g angazüker.

Ludhiana police-i apuba sülen Paras ya Itanagar-i anir arua lir. Brihostibar a o n u n g Arunachal Police indang SIT team-i pa

court-i pa anogo ka police ket nung ayutsü temelaba agüja liasü.

"Police-i pa dang Arunachal Pradesh indang history, geography aser demography indang virtual educational tour sayuogo" ta Special Investigation Team (SIT) superintendent of police Rohit Rajbir-ishi.

Ano, pa dang Arunachal indang tourism landscape aser kin o sobaliba balala aliba indang metetdaksüogo, ta paisa ashi.

Alima indang map nung India aser China tsüngda international border pa dang sayu, ta Rajbir-isa shisem.

anir aru. Yupia nung aliba Chief Judicial Magistrate (CJM)

Süngolu mapa inyaker temi Rs 2 lakh akoksar: Assam Congress

Guwahati, May 29, 2021 (Agencies): Bharatiya Janata Party (BJP) state unit-i Assam nung süngolu ayimertem nem anogoshi taa nangzükba ama magütsür ta Assam Congress-i aitsüogo.

Yashi Assam Chief Minister Himanta Biswa Sarma-i state nung süngolu ayimer nem anogoshia Rs 205 taa agütsütsü ta metetdakja liasü.

"BJP sorkar indang tetuyuba ka ajanga süngolu nung mapa inyaker shiai Rs 2,70,000 akoksaogo" ta APCC-i ashi.

Congress-i election atema

nüboyindang süngolu nung mapa inyaker nem Rs 365 agütsütsü nangzük. Anungji, tang parnok nisung shiai anogoshia Rs 160 akoksar. Asenoki süngolu nung mapa inyakeri takoksa ajuruba züngdangra, ita shia Rs 4500 shi asütsü. Anungji süngolu nung mapa inyaker temi BJP nem vote enoktsüba ajanga Rs 4500 akoksar aser ibaji bendenra küm nung Rs 54,000 aser küm pungu nung Rs 2,70,000 shi adoker" ta APCC-isa metetdaksü.

"Süngolu nung mapa inyaker temi BJP-i tiyazü

nangzükba nung amangba atema sasa bilemstür. Iba nungi tangartemi angazüksüla" ta Congress-isa ashi.

2016 Assam Assembly election nung BJP-i süngolu nung mapa inyaker nem anogoshia Rs 351 agütsütsü nangzükba liasü.

Assam Sarbananda Sonowal-i aniba sorkari küm pungu nung ibaji meinyaktetba sülen taküm assembly election nunga BJP-i süngolu nung mapa inyaker temi tang anguba taa nung Rs 50 enoktsür Rs 217 agütsütsü ta nangzükba liasü.



Arunachal Pradesh kübok Itanagar Capital Region (ICR) nung ozüngi noktangba mozü ayoker tetsüdi Joseph Kino apuba sülen agiba noksa angur. Hokolbarnü Capital Police-i Naharlagun kübok E-Sector nung pa apu. Iba mapang pa ket nung heroin gram 146.41 den Rs 1.50 lakh, laptop 2, iPhone 2, iPad ka aser android mobile phone 5 apu. (Itanagar, May 29)

MULUNGNEN O

" Ne rara junga raraogo, ne alizungji tongogo, ne junga amangtetogo." 2 Timoti 4:7.



Asür K. IMLIYANGER JAMIR (Aonokpu) 18th Dec. 1947 – 17th May 2021.

Ozü temeim tsürabur shiranga aliba mapang nungi pa iba lima nungi pilar, onok timtem aser mangyim jashi nung alidang, kija-kibong, tembar-medemer, kiyonger, adianutem, doctor-tem, yimten, arogo, lokti tentet aser temeimertem shirnokisa sarasadem, nübo aser rongsen agi onok dang meima yariogo, nenok ajak dang kanga pelaba mulungnen o ka yangi lemsateper.

Onoki nenok nem meyipa agütsütsü kecha maka saka Tulusang Tsüngremi nenok talubosa moajang ta onoki sarasademstür.

- Temeim kinungtsü, chirnur, semchirtem & Anük-apangtem.

Mulungnen O

Meimlaba mapang ka nung onoki teti meima aliba asür Watsü AOSANGLA AO (Mokokchung Yim) mapang tatsü ka shiranger la alima nungi piladang kinungertem shisabulu aser mangyim jashi nung alidang kija, kibong, arogo, yimden aser lokti shirnokisa sarasadem, nübo, shisatsü aser rongsen agi nungita yaritepogo nenok ajak dang kanga pelaba lemsateper. Asen teyanglur Tsüngremi nenok mapa tajung meyiba moatsütsü onok sarasadem.

-Temeim Kinungbu aser Kinungertem.



Aso : 06-04-1939 Asü : 16-05-2021

Assam nung Tamulpur MLA Boro Covid19 agi asü

Guwahati, May 29, 2021 (Agencies): Honibarnep Gauhati Medical College Hospital (GMCH) nung Tamulpur MLA Leho Ram Boro Covid19 ajanga asü.

Bodoland Territorial Council Chief executive member (CEM) aser United People's Party Liberal (UPPL) president Pramod Boro-i iba osang metetdakja liasü.

Assam Assembly election 2021 nung Leho Ram Boro-i United People's Party Liberal (UPPL) ticket amer takok angu.

"Tamulpur LAC nungi MLA Lehoram Boro tanü alima nungi pilaogo. Pa ajungbena asüba ya Tamulpur region aser UPPL atema takoksa ulura lir. Pa taküm alidang Tamulpur region renloksü atema bendanga agüja inyakogo" ta Boro-i ashi.

Anogo ishika tejaklen MLA Leho Ram Boro dak COVID



Leho Ram Boro (File photo)

aliba puteta liasü aser GMCH nung anioka anepaludang pa stroke asü, ta CEM-isa metetdaksü.

May 26, 2021 nü Gossaigaon constituency nungi Bodoland People's Front (BPF) MLA, Majendra Narzary COVID-19 ajanga asü.

Narzary-a Gauhati Medical College Hospital (GMCH) nung anepalua arudang asü.

Manipur nung COVID curfew atsülanger

Imphal, May 29, 2021 (Agencies): Manipur sorkari district 7 nung COVID curfew ano anogo 14 atema atsülangogo.

District tenetji- Imphal East, Imphal West, Bishnupur, Thoubal, Kakching, Churachandpur aser Ukhrul lir.

District tenet nung talenba kar salar June 11, 2021 tashi

curfew alitsü ta sorkar metetdaksüogo.

Manipur nung COVID-19 tensa mejungi lir. Hokolbarnü COVID-19 agi shiranger nisung 13 asü aser nisung 732 dak putet.

Tasür 13 züngsema Manipur nung COVID-19 agi asür nisung 761 kümogo ase tang nisung 7602 anepaludar.



TIR YIMYIM YIMOBILEM (EDITORIAL)

DIMAPUR AMUNGNÜ, MONUPII (MAY) 30, 2021

Kibubaji asen teka tajichi

Akhi putu mapang teka tajichi ta asüba tetezüji teyarir tulutiba dang jaa liasü, anungji shiba atema südir süang teka tajichi nisungji kanga temulung lemtetba, mapa takok nisung liasü. Aji oda, tanü putu nunga teka tajichi (right hand) tetezüji kasa mulung lemtet teyarir tulutiba dang ajar. Iba mulung lemtet tangatetba nung David chubai Tenüngsang ken 16:8 nung Kibubaji kü teka tajichilen lir, anungji shingaia ni manokshidaktsütettsü ta ken mejema aten. Pai iba ken mejemba mapang ya pa tetsübu tensa nung liasü asü südi ta asenoki kasa tapu tenzükba mezüng tekong nung, "O Tsüngrem, ni kümzükang, kechiaser ni nü dak jenoker," ta sarasademba olen nungji angatetter. Nisungi pa teka tajichi asütsü nisung ka shimba tetezüji, pai mapa ajakbo makoker aser meinyakteter aser pa shisatsü agia matonger, anungji aiben pa meyong teka tajichi asütsü asoshi shimba nisung nungiang shisa agia inyaker. Kasaji kodangsa asenok taküm nung tang ama tetsübu aser shisabolu ajurudir, asenoka asenok asoshi teka tajichi-ji shiba asütsü ? Asenok asoshi teka tajichiji asen government asünung ajungtsü na ? Asen kinunger doctor tajungtibaji asen teka tajichi asü nung kümzükttettsü na ? Mesüra asen akaba rongsenji asenoki asen teka tajichi amai bilemer asü ? Tanü mapangba ya ali rongsen agir magima bendena yur tango mesashitet taküm aoba putu lir. Iba tangoji asen teka tajichi jagi agütsütettsüsa asenok alitsübjaji tanü alima tensa ya ajanga Tsüngremi asenok den jembir. Kasa tapu aser tekong nung David chubai ashir, " Ne teti Kibubaji kü jakdang südaktsür, kechiaser Paji kü tajichilen lir, ni manokshitsü." Tetezü asen taküm nung tebilemstsü arudang, tebilemstsüji Tsüngrem dang tuluba küm daktsür tsübu aitra, anakshitsü, laotsü aser asütsü. David-bo yamaji masüa ta iba lai yagi asenok dang ashir, kechiyong kodang pa tsübu aiter, Pai Kibuba dak rangloker, kechiyong Kibubaji teti pa jakdang lir. Aji oda, kodang shisabolu aitdir, pai pa teka tajichilen aliba Kibuba Tsüngrem dang asüngdang. Ibayongjiang paisa, Tenüngsang ken 119:105 nung, Tsüngrem dang, "nü o ji kü tsüng asoshi milen aser kü lenmang asoshi tesangwa lir," ta ashiba angur. Tetezüji, asen tajichi südaktsüba Kibuba Tsüngrem o jagiang, tanü ama maparen aika nung telemtetba magiteti moutet aser meinyaktet alidang lenmang sayur. Aiben asenoki asen taküm aser kibong nung timtem shisabolu agi atongdang, Tsüngrem dang asüngdang masü saka asen shia metetba kolok dang asüngdang. Asenok lendong agi meketbangdang, Tsüngrem o agi kechi ashir ta masü saka asen akaba aser asen tashi dak temulung alemer. Iba jagi asenoksasa asenok jenokdak aser kümzükdak lenmang menguteti, alima nunga kena melidang ama samadoker. Teti asen teka tajichiji Kibuba Yisu Khrista asütsüla. Idangjiang kodang kechi asenok nungdaker, aji Pa dang asüngdangtsü, kechiyong Paji, David-i ashiba ama asen Right hand. Iba Right hand-ba dangji dang asenok timtem aser tetsübu mapang tekümzüktsü lenmang asüngdangtsüla. Atangji, alima asünungji tanüa asenok meketa lendong timtem jenti lir, ajisüaka asenoki lendong timtemji masü saka asen jakdangbo teti Kibubaji südaktsütsüla. Iba tashi jagi dang, asenok kümzükba aotsüsa asen tetsüng milenji sayutsü.

OLEMSABANG

NE KIYONGERJI SHIBA....?

- Jongpong Imsong

Alima poketeter külen kecha mali asü oda ashitsü agi tazüngla dang liasü ta asenoki angatettsü akok. Meimchertem sangrasangjiba aser kechisarena porateta yanglua tasen tasen ngutetba itemji inyaktetbatem kong nungi aser ya kechi ajanga angur..? Aji oda alima tashitemet aser shisashirtem, tanga yimsüyimpang amangbaren aikati kechisarena aika shiaka aser belemaka item ajak agütsüsang ka lir aser ibaji bushidangra ya tanga masü saka kechiasarena ajak poktetdaksüsang ka lir aser ibaji teyanglur Yehova Tsüngrem shiba dak asenok Khristantemi amanger. Alima poktetba otsüren aser ano Laishiba nungi bushidangra tazüngla süngdakja taküm alibatemi kong nungi ya ajak Tsüngremi poktetdaksü aser alipok dang nungi soyapokya a liyonga aruba adangji nung angutsü. Tsüngremsa tabensaba aser temeim akaba asünung alinük balala nung asenok meimchertem soyapokya alitsü maongka tajung agütsüba ajanga tang tashi linük ajaklen pei sasep nung jangratema libalirua aoba asen tenük agi angur.

Alima tsütsü nungi kodang asenoki jungjunga shisadangdir asen kiyongerji shiba/shirnok..? Tatsütiba agi asen linük (Nagaland) anasa koba linük (Assam) lir ibaji asen kiyongerji asütsü. Yamaji linük ka den mesüra ka denbo asenok alima nung alirtem kin aser linük balala den kiyonger süa alima libalirua aotsü. Kodangsa asen anasa aliba neburtem tensa balala ajangshia aoer aser oda timtem aser temoatsü mapang ajak nung anasatiba linük nungi teyaritep aser amaletap tajung ajanga maparen balala aser taküm jangratema libalirua asenok meimchir ajak soyapokya a liyonga aoer. Ano iba den tongtipangsa alima rara tulu atokdang tsükchir den raratsü asoshi renembaji kodang reprangdangdir anasatiba linük nungi teyaritep asüngdang aser yamaji nebu, rongsen aser nisung teyaritep tajung den taküm tashi bendanga agüja temeim mapa mulungso, tagütsünü, yaritepba mapa tajung inyaka aliba angur. Aser talisa asenok meimchertem asoshi alinük kati ka timtem mapang nung teyaritep tajung agütsütepaji kanga jangratemtsü aser tangar linük asoshi aser tongtipangsa koba linük neburtemi item temeim mapa nung shilem magir parnok asoshi tangazütsü tasa den tatishitsü tajung sayuba angur. Anungji alima asoshi anasatiba temeimtepa kiyongerji oda iba ama mapang kanga dang teyari nungdaka aliba tensa aser ali shi nung timtem terokong aser tekangshi ajangshidang teyaritep tajung den temeim mapa sayuba aser item mapa tajung inyakba linük asoshi tarutsü putu nung par aso neburtem atema temaotsü senmang tulutibaji asütsü. Aser ibaji alima konang anguba tang masü saka koba linüki mapa tajung meinyaker parnok linük asoshi tenük lapokba mapa tajung rongnung ka asütsü.

Tanü ama tensa alima rangben nung aliba neburtem ajaki tsübu aser aoksatapa atalokba wara COVID-19 asen den alitsüsa kümogo. Iba nungi na aser ni jenbua mali aser iba asoshi tenokdangtsü tasa aser lenmangtem aika asameyanga lokti balalai shisa ajak ramaa aser koma, koda asütsü aresangtepa taküm kümzüktsü bushitepba mapang kati asenok menepogo. Sürabang iba tensa nung asen temeimtiba kiyongerji shirnok/shiba..? Ajaki kanga junga meteta aser asen tenük agi ngua jila aser yimsüngtem aika nung neburtem COVID-19 tashidak keta lir ta puteter külen Sorkar aser kiyong balala nung yimden linertemi alima ozüng agi item ki ajak shibangja parnok kidang nungi kimai alutsü memelai karbo kanga tang timtem ajuruba angutsü. Aser item neburtemji nai khen süoki ia belemdangra meimcher mulungjang nung mesemi kanga tang tetsübu aser shisabolu ajurayaa alitsü. Aser iba tensaji nai aser ni khen parnok tia jagi oer belemdangra iba mapang nung ne temulungjangi kechi aittsü. Iba kasa mesüakba mesüaka khen mapang ka nung ni asoshia tatalokba tensa ka ajurua liasü- tanur küm ka ajungba tasoba anogo benjong sarasademtsü jaok aser oa dener külen tasüngnep nisung ka külem telok nungi COVID-19 putet aser ni asoshi joko lenmang ajak agi kidang kü kija taktang balaka nung alitsüsa kumatok, aser ozü kibong ajak joko tangar den ajuruteptsü tamakoktsü liasü. Iba mapang kü kiyonger kati o pong ajanga ner kibong nungdakba kar lira kü dang shiang ni alitsüdi ta ashi. Iba mapang nung kü mulung nung tepela tuluka liasü aser nüksü yima Tsüngrem nem tenüngsang agüja liasü. Anogo ishika lir külen ni Negative putet aser joko kidang nungi kimai atoka liyonga ao. Tang mapang nung shirnok COVID-19 puteta pei ki telong nungi matoki lidaki parnoki temulungjang nung belemba aser tebang agi meshitetba shisabolu oda süadoktsü asü mesüra anebtsü/manebtsü ta kanga dang timtema aliba tensa ka nung lir. Tang tashi shirnok iba tashidak nungi jenbua lir na anasatiba kiyongerji item neburtemji asütsü. Oda kin telemsa makai pei alidak kiyong nung aser aseni yaritettsü lenmang tang lira akok tashi parnok den ne temeim mapa, chiyungtsü, mozü, sarasadem den nungdaka aliba kar nai yeritetlasang koda jangratemtsü aser tepelatsü asütsü. Kechiaser parnok ya kiyongertem, kinungertem, yimsüryimertem, aser lokti balalai sendoker aliba tensa ka parnoki ajangshia odagi. Na parnok den ajuruteptsü tamakoktsü saka o pong ajanga parnok den khuret lemsatapa aser nungdakba kar ali asü ta sensaksema yariteptsü ne kiyongerji ibaji asütsü. Kechiaser Tsüngremi o ashir (Luk:10:28-37), nisung shiba auer rakzükraktere ajurua pa tasütsüsa yirutsür pa akaba oset ajak bener oer lenmang nung teyarir mali toktsüba angutsü. Kasa lenmang nung nisung shibai pa zübu amtsür mozü teperi agüja anepalur ano pa reprangtsü asoshi taa talang agütsür ano tali atokra agütsütsü nangzuka pai toktsüba angutsü.

Tang ama tensa ka nung asenok nisung shiai inyaktettsü mapatem aika dang lir aser itemji tangatetba tajung agi alima nung nungdaka aliba neburtem kar danga na akaba ali rongsen ajanga yaritetra koda jangratemtsü asütsü aser iba jagi neburtem asoshi tatishitsü tajung tangazüktsü alitsü. Ashiko kari mapa tajung inyaksü belemteta ano nungdakbapur ne tenük agi angur saka iba mapa tajung inyaksü memulungtetra khen aroka shisadanga asen akaba ali rongsen ajanga koda mesüi tepetzük tia nung aliba neburtem den temiem mapa tajung inyaksü tang ya mapang tajungji lir. Anungji iba ocet ajanga ne kiyongerji oda tang mapang nung shirnok timtema lir shi aser tanela nung teyari kanga nungdakba aliba tensa nung nai akokba teyari tilaka jagi koda mesüi temtima aliba nebur yariba nisungji ne kiyongerji asütsü ta angateta mapang aser mapa tajung inyaksü maongka asen dangi arudang jetta inyakatokang aser ibaji ajangja na tepelatsü asütsü aser ibaji ajangja Tsüngrem sentsüwangshidaktsütsü ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Myanmar nung ano Tenla ki ka amak



Myanmar nung St. Joseph Arogo Tenla ki injang agi khasatsür aliba noksa nung angur.

May 29, 2021: Myanmar kübok Kayah state nung sepaitemi ano Tenka ki ka amak; May 26, 2021 aonung sepaitemi Demoso jila nung aliba St. Joseph Arogo Tenla ki dak injang aika khaloktsü, ta Arogo osang k ajanga metetdaksü.

Sepaitemi Tenla ki kichiba aser jara injang agi khasatsü. Iba mapang nungji Tenla kidang aser Tenla ki compuond nung nisung shinga maliasü, kechiyong iba tesem nung rara aliba ajanga nisung ajak jenseper liasü.

May 23 aonunga Kantharyar yimdak sepaitemi Sacred Heart Arogo amakba mapang nung Khristan pezü kaset aser 8 yirua liasü.

Yangon nung tongti putir, Charles Bo-i tekülem kitem ajak kümzüka ayutsüla, kechiyong International inyakyim nung tekülem kitemji sobaliba kiojentem lir, ta mepishia metetdaksüba sülen anogo ka dang lirbo St. Joseph Arogo Tenla ki amak.

Paisa telok ajak dang rara anentsü mepishia, "Asen nüburtem sensakertem lir. Covid-19 ajanga nisung aika sensak tia nung lir, aser maneni coronavirus ajanga tanaben amokmerener. Tang ama tensa ka nung raraba ya taochi maket," ta metetdaksü.

Myanmar sepaitem aser People's Defense Forces den Karenni National Progressive

Party tsüingda rara tesashiba akümba sülen Kayah state aser Shan state na nungi nisung 50,000 dak tema jenshia Arogotem Tenla ki aser convent balala nung jenoka lir.

Myanmar nung Loikaw Arogo kübok social arm Karuna (Caritas)-i linük nung jenshia alirtem nem chiyungtsü den teyari balala agja arudar.

Karuna (Caritas) nungi putir, Aloysius Thet Htwe Aung-i, agency-i jenshia alirtem nem anogo shia chiyungtsü, tejenokdak, mozü aser hygiene kits agütsüdar, ta metetdaksü.

Kayah state nungi nisung 37,000 dak tema jenshiogo aser Karen state nungia nisung 45,000 dak tema jenshiogo. Iba dak alia Kachin state nung nisung 10,000 shi jenoka lir aser Chin den Magwe regions nung nisung 10,000 jenoka lir.

Taküm February 1 nü Myanmar nung sepaitemi democracy lenirtem apuba sülen yimsüsüba mapang nungi tenzüka sepaitemi longkak aiter 800 dak tema tepsetogo.

Tang Karen, Kachin, Chin aser Kayah state tem nung sepaitem aser lisopur telungpurtem tsüingda rara tamajungba akümba ajanga nisung aika pei talidak yutsür jenshir.

Khristantem dang sensak tia anentsü atema inyaksü ayongzüker

May 29, 2021: World Hunger Day (May 28, 2021) anogomong nung Khristan charity telok balalai Khristantem dang alima nung aya-tzüra aser sensak tia anentsü atema inyaksü ayongzüker.

UN World Food Programme Executive Director, David Beasley-i, tang alima nung coronavirus wara anema raraba mapang alima nung aya-tzüra wara ajurutsüsa lir, ta metetdaksüogo.

Coronavirus wara den külemi climate change aser rongsenkettsüing jenjang tamajungba akümba agi nisung million aika aya tzüra tia nung lir, ta pai metetdaksü.

Khristan charity telok- The Hunger Project ajanga ashiba agi, tang alima nung nisung million 690 tashi aya-tzüra tia nung lir, aser coronavirus wara ajanga ano nisung million 130 tali bendenloktsüa akok.

Khristan charity telokisa, alima nung aya-tzüra tia nung alirtem shilem 60 bo tetsürtem lir, anungji alima nung nisung

ajak anema alitsü, pei sasa tebok sünga litettsü aser akhümket taküm litettsü atema alimai longjemmer inyaksüla, ta ashi.

Khristan charity telok- Compassion UK-ia World Hunger Day anogomong nung alima nung sensak tia nung alirtem nüngdak balala metetdaksüba den külemi Khristantem dang sensak tia nung alir tanurtem aser kibongtem sensak tia nungi anitettsü atema yaritsü ayongzüker.

Osangbener den jembidang India nung tamalen slum area ka nung alir sensaker ka tenüing agi, Jane'alam Sheikh-i, "Küno tetsürüla küna aonung tzü dang jemer mejanga liasü. Ayaba agi tebok nung tashitsü atu. Kodang ang chiyungtsüar memeteti tsübuua bilem. Tetsü ka aser tebu kati pei chir memesütetbaji tesasatsüka lir," ta ashi.

Ajisüaka Jane'alam-i, Khristan kibong kati parnok yariba sülen pa taküm nung temelenshi adoka liasü, ta

metetdaksü.

Jane'alam-i, "Ni arrshi küm pezü asüandang onok kiyong nung Arogo nungertem arua parnoki onok yariner ta onok dang shia liasü. Compassion UK ajanga Arogoi onok shi nüngdak peritsüba dang masü saka onok nem shisaliok-a agütsü. Ozü tsürabur kanga pelaba ni bilemteter, iba mapang nungjagi tarutsü atema onoki teimla angu," ta metetdaksü.

Khristantem teyari ajanga Jane'alam school azüing aser tangbo pai-a charity telok- Pursuit International achaayanger. Iba teloki India nung tanurtem aser lanurtem yarir.

Pai ashiba agi, Compassion UK ajanga region nung tanur meyirjang aika yariba den külemi kibong aika sensak tia nungi anitetdar.

Feed the Hungry charity nungi Gwyn Williams-i, "Tsüingremi asenok repranger. Anungji maongka angudang telemtetba agia nüngdakbapurtem dang temeim sayua anepalutsüla," ta ashi.



May 27, 2021 nü Chakhesang Baptist Church Council (CBCC)-i Phek DC, Razouvolie Dozo ajanga Phek District Task Force (DTF) nem sen lakh 2 (2,00000) agütsüandang tangokba noksa nung angur. Noksa nung Deputy Commissioner, Dozo den Director, Chakhesang Mission Society CBCC, Rev Dr. Kowepe Kanuo, Chakhesang People's Organisation Tir, Mikha Kenye; Phek SP, Vesupra Kezo aser CMO, Phek Dr. Khriezotuo Paphino nung angur.

ANO GO ABEN TSÜNGREM DEN

NE KOLAK TEJAKREP

"Iba lungma nung shiba tsükdir pa anüka raksatsü; saka shiba dak ibai tsükdir, iba jagi pa auyi küma menüngsatsü" (Mt. 21:44).

Lungji Yisu. Pa temetsüdaksü lung ka liasü, aser lung nungji metsüdaker (Rom 9:33; Isa. 8:14). Yangi tangazüktsü lesson tulu agütsür: Tsüingrem anema kodanga teinyak!

Paul yimsü nung tejangra tulu aliba ngasangatem aser asüküm nisung ka liasü. Pa Kibubai atsüzük, aser tenük pokdaksü aser ochiba sayutsü pa dang sayu: "Aso anema metsütsü pa asoshi tasak liasü" (T.Mapa 9:5). Paul Professor Gamaliel kübok tangazüker ka süaka, pai iba ochiba timi angatetta mali asü. Kechiaser Gamaliel asoshi iba ama Teratatsü tia nung pa leniba nükjidongji: "...Saka ibaji Tsüingrem nungi süra, nenoki parnok samadaksütsü makoktsü, aser nenok Tsüingrem anema Rarartem ta nenoki angatettsü" (T.M. 5:34,38,39).

Tanü Tsüingremi alima ajunga nung sayutsüingitsü asoshi Khristan mapa tenzüka aika adokdaksüogo. Kar kijai, kibong telungjem aser kar tentet ka kümer inyaker. Asen lima teraksa lima nung onok mapa tajungba, tanela nung inyaker ta tokteper! Asenoki iba tangatetba memelenshira asenoki ajak dak tai kenshia bushitsü. Asenok dak aliba anak dang nungi tangar dak aliba anakji tuluba angutsü! Khrista kangkii asenok dak mapa meinyakdaksü tashi iba tangatetba memelenshitettsü. Pei dak aliba tashi mait mangatet tashi rongsen, mapang aser nübu indokba kisüing jagi Khristan tenzüka mapa nung takok mangutsü.

Khristan minister aser tenzüka mapa nung shinga tabensaba mali. Ajak dak tashi mait aser tashi lir. Asenoki tangar meraksadaksüi yanglutsütsüla. Tsüingremji Lung ka lir! Ni iba nung metsüksüla aser kü kolak mejakreptsüla. Adianu meimtepaji Tsüingremer metsü- anungji asenok o nung aser mapa nung meimtepedi.

Kibuba Yisu, Nai onok dang meimba ama onok rongnung meimtepa Khristan tenzüka mapa tashi ita inyaksü yariang. Amen.

Khristan putir, Swamy temang tamajungba küma hospital-i anir ao

May 29, 2021: Arrshi küm 84 Khristan putir, Stan Swamy tepuokdak temang tamajungba akümba sülen Bombay High Court-i pa hospital-i anir oa yaritsü tuyuba sülen pa Arogo indang Holy Family Hospital-i anir oa yaridar.

Jesuit Putir Swamy ya yaküm October 9 nü Maharashtra yimtiba, Mumbai nung aliba jail ka nung puoka liasü. Pa dak Parkinson tashidak putetba den külemi kanga tambur akümba ajanga temang nung timtem aika lir.

Swamy indang counsel-i Bombay High Court dang putir temang tamajungba kümogo, anungji pa jail hospital nung masü saka hospital tajung nung treatment agitsü nüngdaker, ta ashiba sülen May 28 nü Bombay High Court-i putir hospital kati anir oa treatment agitsü tuyua liasü.

Court-isa Catholic hospital-Holy Family Hospital dang putir yaritsü atema pa nem temeja doctor ka lezmükjang ta tuyu.

Jesuit lawyer aser putir, A. Santhanam-i, "Tawa putir Swamy temang kanga tashi meiti

kümogo. Pai mejajateter, pa sasa mechiyungteter aser blood pressure kanga ajema kümdar. Pa tanü mesüra asüing hospital-i anir aotsü," ta metetdakja liasü.

Yaküm October 8 nü Jharkhand kübok Ranchi nung pa par kidang lia police-i apuba sülen October 9 nü Mumbai nung aliba hospital nung puoka liasü. New Delhi nung Centre sorkar atsüingdoktsü atema Putiri Maoist telungpurtem den asalentong yanglur, ta pa nem tai tonglokja liasü.

Taoba hopta court nung pai bail meshiba temepishiba ken o angadanga sülen court-i pa dang sorkar hospital nung amongtsü tuyu saka pai magizüki liasü.

Swamy-i Ranchi-i oa par kidang amongtsü atema bail meshi saka court-i magizük.

National Investigation Agency (NIA)-i pai bail meshiba anaben tashi magizükba sülen pai April 26 nü pai court nem bail temepishiba agüja liasü.

India nung Unlawful Activities Prevention Act ozüing kübok tang nisung 16 aija alirtem rongnung pa densema lir.

OLONG PAITEP # 5827

1						2					3
								4			
5		6				7					
8											9
									10		
				11		12					
		13									
14						15					
			16								

TIPLÉN		LANGTSÜNGLEN	
1. O jembitsü tashi	- 8	1. Tepok telung nung shilem ka	- 7
5. Süngjang tapu ka	- 5	2. Tamajung aküm	- 5
7. Tekanük nung enokba	- 5	3. Chi den külemi achiba	- 3
8. Teka amtep	- 5	4. Meimchir alimai aruba	- 3
12. Tzük asendak	- 5	6. Laishiba nung ayong ka	- 4
14. Tsünpang tema aliba	- 5	9. Tarutsü nükla	- 7
15. Ken atenba yimya	- 5	10. Tamendakdak/Nükjidong	- 4
16. Asangur	- 8	11. Tenük-telen mejungi aküm	- 5
		13. Terok nungi adokba	- 3
		14. Meimchir telemasa	- 3

OLONG PAITEP # 5827 TELANGZÜBA

TIPLÉN :		LANGTSÜNGLEN :	
1. Taa, 3. Teküm, 6. Aibelen, 7. Aut,		1. Tai, 2. Asensor, 3. Tanü, 4. Kua,	
9. Ajizük, 10. Ojala, 11. Semer,		5. Mitsüksü, 6. Azübenshi, 8. Lah,	
13. Sen, 15. Kioktsü, 17. Itsük, 18. Kar.		9. Jangkok, 12. Akok, 14. Nashi,	
		16. Sür.	

KOMA SÜLA TELANGZÜBA

Q. Tenla ki shibangtsüba masü lokti sentep malitsü ashiba dang, anungji asenok arogo shia nung lokti sentep mali tashi tenla ki azünga metoktsüi nisung ishishi lemsar kena manen sarasademba yinzü, Chain of Prayer, sentong tenzük nunga koma süla ?

Aor-i/ABAM-i kodanga menangzük dangba taitem nangzüksü tang ya mapang tajung. Takoktsü-ang süra Tir yimyim-i platform ka agüja taitemji bendena tenla-kiji azünga metoktsu-i nangzüktep nung ajungtsü.

-C.R.Pongen

Tenla ki tazüng metoktsünü dang chain of prayer agibajia majung kechiba nisung aruli oli asüdang kasa tang akümer iba tangjibo tekülem agiba tajungba.

- ns jr

TANÜBO NAI LANGZÜANG

Q. Commonwealth Day dang _____ anogo ta-a ajar.
 A. Empire Day B. King Day C. Kingdom Day D. None

===== (Taruba adok nung onoki langzüsü)

YASHI ADOK TELANGZÜBA : 1957


AO OSHI ANGAZÜKDAK:
TANÜ ANGAZÜKTSÜBA OJANG



Jepjeb
 (v) temulung masü o tanemi aser maneni jembia nemnemshinemba (murmur)
 * Lai kanga **jepjeb**, anungji pai tejepjeb ta ashi.

Jebket
 (v) Ak amala kiset shiruru kanga junga ajepba agi tali yiradaktsüba (overfed)
 * ozü ak nem chi tajung agütsüba agi kanga **jebket**.

NAI-A YA METETTER MA?



Bodhbarnü, Art putiotsü meteter aser anepalur, Laurence des Cars ya 'Louvre Meseum' indang president ama shimogo. Paris yimti nung lapoka aliba Louvre ya alima nung 'art' Museum tulutiba lir aser iba museum lapoker küm 228 nung tetsür rongnung mezüng president ji Laurence asütsü.

SUDOKU # 5870 TELANGZUBA # 5869

4	7					1	3	7	1	9	3	4	5	8	6	2
				9			6	2	5	4	8	6	1	7	9	3
9		5	1		6	8		8	3	6	7	9	2	4	5	1
7	9					1	4	9	6	1	5	3	4	2	8	7
	5		8		9	6		2	4	2	7	9	1	8	5	3
6	2		4			5	8	9	5	8	3	6	2	7	9	1
		2			5		3	1	1	9	2	4	5	3	6	7
5			3	7				8	6	4	8	1	7	9	3	2
3			2		4	9	6	5	3	7	5	2	8	6	1	4

OJANG LUTEP # 5413

TSNYTEIAKÜ	:	<input type="text"/>
PAMA	:	<input type="text"/>
NTJEI	:	<input type="text"/>
KALIA	:	<input type="text"/>
ISHA	:	<input type="text"/>
ETEMETR	:	<input type="text"/>
LIMABA	:	<input type="text"/>
ANGJAA	:	<input type="text"/>
WNGADA	:	<input type="text"/>
KTEMEKOT	:	<input type="text"/>

OJANG LUTEP TELANGZÜBA # 5413

TERAKA METETA YUR AJAK METET AMA BILEMA INYAKDANG LENDONGI AYIR

TAN HOPTA ATEMA - KOMA SÜLA ?

Q. Asenok Aotsür Aor kidang tangar nisung kilir mayu nunga koma süla ?



May 29, 2021 nü Jammu yimti kübok Bhagwati Nagar nung yipten 500 aliba Covid-19 hospital ka semzükba sentong nung Jammu & Kashmir Lt. Governor, Manoj Sinha adenba noksa nung angur. Iba hospital ya DRDO-i renem.

Modi sorkar tamakok tulutibaji Covid wara mazüoktetba lir: Survey

New Delhi, Monupii/May 29 (Agencies): Narendra Modi-i aniba sorkar küm tenet yimsüsüba mapang nung tang mezüing sorkar tenüing mejungi kümdar.

ABP-C Voter Modi 2.0 Report Card (survey) ajanga ashiba agi, iba survey nung shilem agir aikati Modi sorkari inyaktetba tulutibaji Jammu & Kashmir nung Arlla 370 agienba lir, aser Modi sorkar tamakok tulutibaji Coronavirus wara junga mazüoktetba lir ta shiogo.

Iba survey ya Lok Sabha menden 543 kübok agia liasü aser nisung lakh 1.39-i shilem agi. Iba survey ya taküm January 1 nungi tenzüka May 28, 2021 tashi agia liasü.

Survey nung shilem agir aikati Modi sorkar dang mepelaba lemsatop, aser tesüiba küm tenet tsüingda Modi sorkar dang melung achiba kanga ajema kümdar, ta bushitet.

Survey nung telangzüba agütsür shilem 47.4-i, Modi sorkari inyaktetba tulutibaji Jammu & Kashmir nung Arlla 370 agienba lir, ta ashi.

Shilem agir 41.1-i, Modi sorkar tamakok tulutibaji coronavirus wara junga mazüoktetba lir, ta ashi. Shilem agir 23.1-i, Modi sorkar tamakok rongnung tanabubaji aluyimba ozüing tasen ajanga aluyimertem mepelaba lir, ta ashi.

Shilem agi 52.3-i, linük shibangba mapang nung Centre sorkari parnok meyari, ta ashi.

Vote agüja shilem agirtem aikati, coronavirus wara tanaben prokba mapang nung election sentongtem agiba atema Centre sorkar dang mepelaba lemsatop.

"Linük nung coronavirus tanaben prokba mapang nung election nüboyim sentongtem nung Ato kilonser, Modi-i shilem agibaji tim asü?" ta asüingdangba nung shilem agir 59.7-i, linük Ato

kilonser ka ama tang ama tensa ka nung Modi-i election sentong nung shilem agibaji tai, ta ashi.

Ano shilem agir shilem 60.8-i, states/UT pongu nung assembly election aser Uttar Pradesh nung panchayat election atsülangstüla liasü, ta ashi.

Shilem agir 55.3-i, tang wara aliba nung ajemdaker tetenzük nungi Kumbh Mela ya tenüing agidang agitsüla liasü, ta ashi.

Shilem agir 47-i, linük nung diesel aser petrol jenjang atuba ya Centre sorkar ajanga lir, ta ashi.

Modi sorkar aitsüba olen ka nung shilem agir 64.4-i, Modi sorkar mapatongtem ajanga tajangzük tuluba angurtemji corporate houses lir, ta ashi.

Shilem 44.8-i, China-i Ladakh region nung India nung li atsünga agiba ya Centre sorkar tamakok ajanga lir, ta ashi.

Jaishankar-i Blinken densema US ketdangser aika den senden amen

New Delhi, May 29 (Agencies): India External Affairs Minister, S Jaishankar-i Hokolbarnü US Secretary of State, Antony Blinken ajurua senden menogo; May 3 nüa London nung tena G-7 Foreign Ministers' senden nung ajurutepe liasü.

Tang India nung coronavirus vaccines agi anüingba mapang nung US nungbo vaccine aika rizünga lir aser vaccine yanglutsü atema parnok ket nung raw materials peria lir.

Senden tetenzüklen Blinken-i, 'Jaishankar ya kü tembar aser külem tenzüker ka lir' ta metetdakja liasü.

Blinken-i, "United States aser India nati asen tendak tayongzükba onük aika atema longjemer inyaker," ta metetdakja liasü.

"Onoki (US-India) longjemer Covid-19 anema rarar, onok longjemer climate change atema inyaker. Quad aser United Nations nung reju balala ajanga onoki longjemer region aser alima nung tongtibang onük balala atema inyaker," ta Blinken-i ashi.

"United States aser India na partnership ya kanga tongtibang," ta paisa ashi.

Jaishankar-ia, "Onok o lemteptsü atema tongtibang onük aika lir. Kümtem süia aodang tesendaktep tajungba akümer, aser maneni yamaji

asütsü ta ni amanger. Tang ama tayongzükba mapang ka nung onok yariba atema ni iba maongka agia Secretary aser US administration dang pelaba lemsateper," ta metetdaksü.

Blinken-i, "Wara tenzüka mapang nung India-i United States yariba onoki bilemteter. Ibaji onoki kodanga mamatoktsü. Tang onokia India yariner," ta metetdaksü.

Tesüiba ita asem tsüingda Jaishankar aser Blinken na pezüben tashi o lemtepe liasü aser item rongnung kabo Quad Foreign Ministers' senden aliba mapang nung video-conferencing ajanga jembiba liasü.

Tesüiba ghonda 24 tsüingda Jaishankar-isa US administration nungi tongti ketdangsertem- Defence Secretary Lloyd Austin, National Security Advisor Jake Sullivan, US Trade Representative Katherine Tai, Director of National Intelligence Avril Haines, Democratic aser Republican party tem nungi lenirtem aser Washington D.C nung America nung business lenirtem aika ajuruogo.

Anogo ishika jakdang US Tir, Joe Biden-i sangdong ka ajanga, June ita tatemlen tashi nung US-i nüngdakba linüktem nung Pfizer-BioNTech, Moderna aser Johnson & Johnson Covid-19 vaccine dose million 20 agütsütsü, ta sangdonga liasü.

Tang mezüing Mumbai nung Petrol litre nung sen 100 jungogo

New Delhi, May 29 (Agencies): Tan ita gari totzü jenjang 15 ben tashi atuba sülen tang mezüing Mumbai nung Petrol litre ka nung sen 100 jungogo.

Honibarnüa Petrol litre shia poisa 26 aser diesel litre shia poisa 28 atu.

Rajasthan, Madhya Pradesh aser Maharashtra state tem kübok yimti aika nung petrol litre nung sen 100 ajungba sülen Honibarnü Mumbai nunga petrol litre nung sen 100 ajunger.

Tang Mumbai nung petrol litre

ka nung sen 100.19 aser diesel litre ka nung sen 92.17 jungogo.

VAT densema saru balala apir state shia nung petrol aser diesel jenjang balala lir. Linük nung petrol atema value-added tax (VAT) saru timba agiba state ji Rajasthan lir, iba sülen Madhya Pradesh aser Maharashtra na lir.

Linük yimtiba, Delhi nunga petrol jenjang sen 93.94 aser diesel jenjang 84.89 kümogo.

West Bengal densema state pezü aser UT ka nung assembly election agiba mapang nungi

tenzüka vote azüingba anogo tashi gari totzü jenjang matuba sülen May 4 nungi tenzüka linük nung totzü jenjang aiben tuogo.

Tang linük nung petrol aser diesel jenjang timtibaji aliba district ji Rajasthan kübok Sri Ganganagar district lir. Iba district nung petrol litre ka nung sen 104.94 aser diesel litre ka nung sen 97.79 lir.

Tan ita gari totzü jenjang 15 ben tashi atuba mapang petrol litre nung sen 3.54 aser diesel litre nung sen 4.16 tuogo.



Gurugram, May 29, 2021: Honibarnü MG Road, Gurugram nung drive-through COVID-19 vaccination centre anasa gari aika mesenzüteti anendena aliba noksa nung angur.

India nung ano nisung 1,73,790 dak Covid putet aser 3,617 asü

New Delhi, May 29 (Agencies): Tesüiba ghonda 24 tsüingda India nung ano nisung 1,73,790 dak coronavirus tashidak putet aser ibaji tesüiba anogo 45 tsüingda anogo ka kija nung tang tajemba putetba lir, ta Honibarnü Union Health Ministry-i metetdaksü.

Tang tashi nung linük nung coronavirus case ajak agibo 2,77,29,247 jungogo; tesüiba anogo ka tsüingda coronavirus agi nisung 3,617 asü aser asür ajak agibo 3,22,512 jungogo, ta Honibarnep 8:00 ako nung health ministry-i metetdaksü.

Linük nung Covid positive rate shilem 8.36 dang kümogo;

tesüiba anogo 5 tashi positive rate shilem 10 den tajemba lir aser hopta sasep nung positive rate shilem 9.84 dang kümogo.

Hokolbarnü linük nung samples 20,80,048 tendang aser ibaji densemabo tang tashi nung samples ajak agi 34,11,19,909 tendangogo, ta ICMR-i metetdaksü.

Tang linük nung coronavirus agi teshirangdakpir 22,28,724 lir aser ibaji coronavirus caseload nungi shilem 8.04 dang lir.

Linük nung coronavirus agi shirangertem shilem 90.80 (nisung 2,51,78,011) anepogo aser iba tashidak agi shirangertem asüba shilem 1.16 lir



New Delhi, May 29, 2021: New Delhi nung coronavirus anema tenokdangba lia Honibarnü volunteers-i lemsüba chiyungtsü agizüktsü atema tanurtem nokdaka aliba noksa nung angur.

China consulate amakba ken o nung Pakistan-i India anema kuli magütsütet

Karachi, Monupii/May 29 (Agencies): Karachi nung 2018 küm Chinese consulate amakba dak sendakba nung Pakistan-i India densema lir ta aitsüba anema kuli magütsütet. Kiralongrartemi consulate amakba mapang nisung pezü tepset.

Anti-terrorism Court (ATC) Pakistan-i May 26 nü, Karachi nung Chinese consulate amakba atema Baloch Liberation Army (BLA) nungi züngsem kar dak temulung melemi bilemba anema prosecution-i tenük kuli agütsüsupurtem anir marutetba atema tezü adangba lemsatepogo.

Ken o benoka aliba nung, India indang Research and Analysis Wing teyari nung BLA-i Chinese consulate ya amak, koba Pakistan aser China na tsüngda tensendaktep raksatsütsü aser China-Pakistan Economic Corridor project nung tetsükdaktsü adokdaktsütsü atema inyak, ta shia lir, koba The News International sangdong ka ajanga metetdakja liasü.

ATC-VII obendangeri iba ken o investigation officer (IO) dang, ken o benoksang July 7 nü okadaki anir arutsü tetuyuba agütsüogo, kechiyong osang agüjaka iba nisungba yagi

pezüben tashi okadaki maru. Okadak ajanga January ita nisung pongu agütsüogo. Parnok yagi consulate amakertem nem parngbong injang, tejenokdak aser senotsü teyari agüja liasü. Kiralongrara aseme prangbong hadir teperi bener 2018 küm November ita 23 nü Clifton nung amenoka aliba Chinese consulate maka liasü.

Iba lendong nung security personnel aser visa bushirtem nisung pezü tashi kiralongrartemi tepset. Iba tatalokba sülen mapang tatsüka lir, consulate amakertem ya Abdul Razzaq, Raees Baloch aser Azal Baloch ta jangjaa aküm. Parnok asemprongla ya police den khatetba mapang tepset. Parnok ket nung prangbong injang aser bomb aika bona aliba ngutet.

Iba ken nung aija alirtem rongnung Ahmed Hasnain, Muhammad Aslam, Nadir Khan, Ali Ahmed aser Abdul Latif nung Counter-Terrorism Department-i apu. Parnok yagi Consulate amaktsü atema kiralongrartem nem teyari agüja liasü. IO-i ashiba agi, Latif aser Aslam nati parnok apuba sülen hopta ka lir a judicial magistrate ka matsüngdang parnok aibelen angzüko.

Police temisa ken o nung densema alitsü ta temulung

melemba BLA tekolakba Hyrbayir Marri aser tanga lenirtem rongnung Kareem Marri, Bashir Zaib, Aslam Baloch, Noor Bakhsh Mengal, Rehman Gul, Nisar, Gaindi, Sheikhu Sharif, Hamal, Agha Sher Dil aser Munshi nung aitsüogo. Parnok ajak ya iba ken o nung proclaimed offender tem ta sangdongogo.

Iba ken o nung aibelen alir shirnok jenshia senzüdar parnok aputsü atema warrant agüja, ATC-i taoba mapang police dang Hyrbayir aputsü atema Interpol den tongteprateptsü atema tetuyuba agütsüogo. Hyrbayir ya tang tanga linük ka nung jenoka lir aser pai pa jenoka aliba tesem nungi Consulate amaktsü atema asameyanga liasü, ta bilemer.

Ken o benoka aliba nung ashiba agi, kiralongrartemi consulate telungi ait aser injang khaloktsüba den grenade mereplokja liasü aser iba mapang nung checkpoint mezüngbuba nung assistant sub-inspector Ashraf Dawood aser constable Muhammad Amir na khaset. Kasa mapang nung Tahir Shah aser tebu Niaz Ahmed nata visa atema consulate nung mapa inyaka aliba mapang kiralongrartemi tepset.

Vietnam nung Hybrid UK-India Covid-19 Variant ka putetogo

Hanoi, Monupii/May 29 (Agencies): Vietnam nung Covid-19 tashidak tapu tasen ka putetogo, koba mopung nung kanga kara menatepyonga aoe aser iba ya Indian aser British strains temeyoktep ka lir, ta state media-i Honibarnü metetdaktsü. Vietnam nung tang wara pokteter kanga timtepdar aser Hanoi aser Ho Chi Minh yimti amala yimti tulutem densema linük tesadang dak tema iba wara agi kongshir lir.

Vietnam nung tashidak agi nisung 6,7000 kongshiogo aser nisung 47 süogo. "Onoki India aser UK strains nung hybrid variant tasen ka ngutetogo," ta Health Minister Nguyen Thanh Long-i Honibarnü osangbenertem dang ashi.

"Iba tapu tasenba ya mopung nung kanga kara menatepyonga aoe. Terok nung mesen kanga kara züiner aser temeket nunga kanga tashi ita prokshia aoe," ta paisa ashi. Paisa iba tashidak tapu tasenba yagi nisung kwi dak

kongshia lir, iba indang osang tejangja magütsü, saka Vietnam-i iba tengutetba tasen ya yakta world map genetic strains nung sangdongtsü ta ashi.

Long-i, iba osang magütsü tsüngda Vietnam nung coronavirus tapu balala tenet nguteter liasü, ta Ministry of Health-i ashi. Vietnam nung lokti tululu quarantine süraktüba den contact tracing inyakyim kanga junga benokba ajanga tashidak kanga junga aziokteta aruogo, aser iba ajanga alima kintemi parnok tenüngsanga aruogo.

Tang tashidak asendenshia poktetba ajanga nüburtem aser sorkar tsübua bilemer aser ketdangsürtemi nüburtem senzüsenpong aser shishilembaba azioktsü atema tenokdangba agütsüogo. Cafes, restaurants, ku mejepdak aser massage parlour tem aser iba den linük kübok tamangba yimsü dak sendakba nung tongtibang tesemtem aser raliwalir mongjen balala aika shibangtsüogo.

Vietnam nung nütsünyongsük million 97 lir aser tang tashi nung million ka dak tera tema nem vaccine agütsür lir. Ketdangsürtemi vaccine agütsüba maparen takaratiba nung benoka inyaktsü merangdar aser küm tatemibo herd immunity ajangettsü timla lir, ta minister for health-i ashi.

Ketdangsürtemi vaccine alitsü atema nüburtem aser shishilembartem dang sen tenlatsü ayongzüko aser kasa mapang nung embassy aser international lokti tentet balala den teyari atem tongtepratepogo, ta media sangdong ka ajanga metetdaktsü. Linük nung tang AstraZeneca indang vaccine dose million ana shi anunga lir, saka ano Pfizer vaccine million 30 dak tema alizütsü, ta shiogo.

Maneni ketdangsürtemi Russia nung yangluba Sputnik V alizütsü atema sensaksemdar aser iba den kidang vaccine yangludar, ta state media-i metetdaktsü.

Ozü Molungtoka Alisang



Tasoba: 1941

Tasüba: 30:03:2021

Asür P. Lanumeri Longkumer (Chuchuyimlang)

Tia maka küm 11 tashi shiranga yipden nung liasü. Aji taneptsü bushia jaja dang nungi tanü tashi mezüngtangtetba nubu aser rongsen jenti lalua aser sarasadem agi yariogo kangasa pelar.

Tsüngrem tajungsangi maneni nenok ajak moajangma. *-Temeim kinungtsu, chirnur, aser kinunger.*

MOLUNGNEN O



"Tasübaji koda tobur tajung. Ali tanük nung mejanger, temalen tekolak manung mopung tanep agirem lanutem arakzüdaktsür aser item olaji tesüngjem nung angar. Idakji yashi aser asüng ta mali. Tensa mapang amadoker, taitokteper aser tesünep nung alir."

- Sylvia Plath

Yangji asür **A. SHILUYANGBA JAMIR** (Ungma) kinunger ajonga pa timtemba mapang nungi tasüba anogo tashi shirisa rongsen, mapang aser sarasadem agi tongita yariogo, nenok ajak dang mulungnena pelaba lemsateper. Ano yangi mepaitoktetba tepela item telok den lemsateper : Doctors, nurses, staff, Faith Hospital Dimapur, Rotary Club Dimapur, Oriental Colony Council, Pastor, Merali Fellowship aser DABA.

Onoki nenok nisung shia den majuruteptetaka asen tajung Tsüngremi nenok ajak moajangma, ya onok sarasadem.

-Temeim Asür Chirnurtem

OFFICE OF THE UNGER SENSO BENDANG ALI TELONGJEM TENÜNGSANG AGÜTSÜR

Wb. C. Lima Imsong-i Joint Commissioner of State Taxes menden tongtetba atema, Unger Senso Bendang Ali Telongjem-i nümatanga pa nem tenüngsang agütsür.

Pai iba maparen tasen agizüka wadang awawa inyaka aoba mapang, Tulusang Tsüngremi pa nem anema aliba, shisatsü aser arishi talang maneni moajangma ta Senso-i sarasademtsür.



Sd/-
Walu Jamir
President,USBAT

Sd/-
N.Lima Imsong
General Secretary,USBAT

OFFICE OF THE DIMAPUR LIRMEN SENSO TELONGJEM DIMAPUR-797112 NAGALAND ASUKU LEMSATEPER

Anojongi ozu tembar,teyarir tajungka Wb.Er.L.I.Alangba Longchar (AONOKPU) 29th May 2021 asuba osang angashia Dimapur nung aliba Lirmen nung tulu tila ajak aoksar,kanga dang jashia aser sasasetta Lirmen nung tembar aser teyarir tajungka onok rongnungi pilaogoni ta mang ayimer.

Pa takum alidang Lirmen nung den yimten, arogo aser sobaliba maparen ajak nung nubu aser rongsen agi pa/par kibongi onok den yaritepa aruba mapa tajung bilemtteta asur nem tenüngsang agutsur.Tsuraburi tajung inyakba tajangzuk chinurtemi angutsu onok tamang sarasadem.

Tang mapang tensa agi aseni ya-ang ajuru asunung pa asuba mapang DLST aser yimer yimsangertemi asur kibong aser kinunger den arua inyakyim kecha nunga meyariteptetba atema sasar aser nemjema bilemer.

Asur-i toktsüba jabaso, jala, kinunger adianutem ajak den Tsungremer tesunepsuba lidakjang talisa tanurtem den teyanglur Tsungremer tesunepsuba taochi, tawapangba aser tanukba tang aser teti lidakjang ta sarasademtsur. Asur tanela Kibuba teku nung anisungzungdakjangma! AMEN

SD/- P.NUNGSHI LONGKUMER
PRESEDENT DLST

SD/- MANEN LONGKUMER
GEN.SECRETARTY DLST

Central Gaza Strip kübok Nusseirat refugee camp yimtung süa aoba mapang Hamas military wing, Izzedine al-Qassam Brigades nungi sepaitem truck nung sniper prangbong bener mena aliba noksa nung angur.



Mulungsünep O

"Kü shi aser kü melungi tamakok
nguaka, saka teti Tsüngrem kü
mulungjang tashi aser shilem lir"

T. Ken 73:26

Onoki tetidang meima aliba

Wt. Anungla T. Imsong (Longjang)

Tepela menürem jak tener ochishia
aser tamang kateta kinunger ajak
mulung peladakja aliba taküm, nai onok
toktsüdang nai inyakba mapa tajung aser
ne temeim onoki kodanga mamatoksü.

Asen Tebu Tsüngrem den na lir ta
amanga onok mulung anisüngzüker.
Kinungertem mulungzürep mangyim
jashi nung alidang shirnokisa sarasadem,
nübo, shisatsü aser rongsen agi nungita
yariogo, kanga dang pelar. Tsüngremi
nenok mapa tajung meyipa moatsütsü
ozü sarasadem.

~ Temeim kinungpu, Jala aser
Kinungertem.



Asü: 22/05/2021

MENUNGRA BILEMER

Lt. K.TAKUANGSHI.AIER SÜR KUM KA AJUNGER

ASO:
01.07.1927

ASÜ:
30.05.2020



Pongmang ama na iba akumli lima toktsür Kodak limai
aoba sülen tanü küm ka ajunger. Onoki na mebileteti-ang
anogo kata mesüidaksür. Na onoki menguaka aser
mangashiaka na onok anasa teti lir aser nü temeim mapa
tajungtem aser tamang sarasadem agi sünga aliba jakla onoki
kodanga mamatsü.

Tanü anogo nai onok toktsür aoba bileteta onoki na kanga
dang menungra-a bilemer aser sarasadema amonger.

- Temeim kinungtsü, chirnurtem, semchirtem,
kinungertem aser anükapang.

WB.I.TINUMAYANG JAMIR (LONGSA)

1940 – 20:05:2021

KÜBU KIDANG TALIDAK KI TAJUNG AIKA LIR... YOHAN 14:2



OBALAJI TSÜNGCHIBA, MERAKET ASER TEKÜM KÜM SAYUTETSANG LIASÜ

Oba, onoki na ogo ta mebiler
Na onok den tanga lir
aser tarutsü nunga alitsü.
Na akümü kidang nungi
Kibuba den alitsü aoba ka dang lir.
HALLELUYAH !

Kinungtsü Imolemla, jala Bendangtula, Yangsersenla, Limasenla
& Sentikümila, Anük-apang aser semchirtem.

Nenok ajaki onok dang kanga meima sarasadem aser ariabilem
mapatem agi yaritepba ajanga onok mulung nung kanga
kongshio. Onok dang meima anepaluba asoshi CIHSR nung
doctors aser staff ajak dang kanga pelaba shisemer.

Tulusang Tsüngremi nenok ajak talubosa moajangma.

- Temeim Kinungertem -

Urvashi-i timtemer nem teyari agütsü



Mumbai, Monupii/May 29,
2021 (Agencies): Bollywood
superstar Urvashi Rautela-i la
wadang aser taküm nung takok
tulu anguba sülen lokti
tenzüka maparen nung langka
tajung kar inyaktsütsü asoshi lai
telemtetba agiogo.

Tawa, actress Urvashi tebu
Manvar Singh Rautela-i
nüngdakba pur nem jang-o-tsü
lema agütsüogo. Kasa mapang,
Urvashi-ia la indang ken
"Versace Baby" nungi aazükba
sen Covid-19 Relief Fund aser
The Palestine Red Crescent
Society nung tenla agüja liasü.

Urvashi-i Guru Randhawa
den longjemer atenba ken -
"Doob Gaye" ajanga takok tulu

psang ajanga angazükogo.
YouTube nung
iba ken 'view'
million 100 tema
ajangeta lir.

L o k t i
ajangzükdaksütsü
nükjidong yur
Urvashi-i tentet
ka tenzüko
aser la tenü
nung "Urvashi
Rautela
Foundation"
tenzüka lir, koba
a j a n g a
nüngdakba pur nem teyari
agütsü. Tawa, Urvashi
Rautela tebu Manvar Singh
Rautela-i Uttrakhand kübok
Kotdwar' ta nungja agütsüba
jila tila ka nung ayangertem
nem jang-o-tsü lema agütsü.

Urvashi ya Uttrakhand
nungi lir aser Kotdwar tesem
nung ayangertem ayandak
mengui timtemba lai meteta lir.
Iba ama mapang ka nung lai
tebu den longjemer nüngdakba
pur/timtemer yariba ajanga
mapa tajung inyakba sayuogo.

Kasa mapang, iba
mapatong atema Urvashi
Rautela-isa YouTube Channel
ka lapokogo. India nung Covid-
19 anema raraba maparen

pusama lai YouTube nungi
aazükbatem Covid-19 Relief
Funds nung tenla agütsü.

Taoba hopta Cyclone
Tauktae Mumbai kongshiba
sülen sensaker nem lai tejak
nembangba mask den külemi
chiyongtsü tem lema
agütsüogo. Kasa mapang,
Urvashi-i Uttrakhand nung
oxygen concentrator 27 tenla
agütsü aser tarutsü anogotem
nunga maneni linük atema
mapa tajung inyaktsü lai
lemsatop.

Acting tsütsü, Urvashi
Rautela-i Tamil film nung
mezüng shilem agitsü
terenemba lir. Iba film ya sen
aika indoka yanglutsü
asalentong yangludlar, kong lai
microbiologist aser IITian ka
ama shilem agitsü terenemba
lir.

Iba sülen, Urvashi-i ano
bilingual thriller - "Black Rose"
den Hindi oshi nung tanaben
yanglutsü aliba "Thirutu Payale
2" nung shilem agiba angutsü.
Item project dak alaka,
Urvashi-ia Randeep Hooda den
külemi web series "Inspector
Avinash" nung shilem agitsü
terenemba lir. Iba series ya
super cop Avinash Mishra
taküm otsü nung ajemdaker
yanglutsü.

Netflix ajanga 'Ray' sayatsü

Mumbai, Monupii/May 29,
2021 (Agencies): Netflix
indang anthology series "Ray",
koba nungtugu film yanglur,
Satyajit Ray indang otsü pezü
nung ajemdaker yangluba
project ka lir, iba series June 25
nü sayatsü, ta Netflix sangdong
ajanga metetdaksü.

Abhishek Chaubey, Srijit
Mukherji aser Vasan Bala
nungeri direct asüba show ya
temeim, ashioksüba,
aziapongba aser ochi indang
otsü ka alitsü. Iba series' nung
Manoj Bajpayee, Gajraj Rao,
Ali Fazal, Shweta Basu Prasad,
Anindita Bose, Kay Kay

Menon, Bidita Bag, Dibyendu
Bhattacharya, Harshvardhan
Kapoor, Radhika Madan,
Chandan Roy Sanyal aser
Akansha Ranjan Kapoor
nungeri den tanga actor temi
shilem agiba angutsü.

Bajpayee aser Rao nati iba
series indang mezüng episode -
"Hungama Hai Kyon Barpa"
nung shilem agiogo, koba
Abhishek Chaubey-i direct asü.
Mukherji-i tanabuba aser
tasembuba episode direct
süogo, koba writer Siraj
Ahmed-i otsü zülutsü.
Tanabuba episode - "Forget
Me Not" nung Fazal, Basu

Prasad aser Bose; aser
tasembuba episode -
"Bahrupiya" nung Menon,
Bag aser Bhattacharya
nungeri shilem agiba angutsü.

Vasan Bala-i "Spotlight",
direct süogo, koba episode
pezübuba alitsü. Iba episode
nung Harshvardhan Kapoor,
Madan, Sanyal aser Akansha
Ranjan Kapoor nungeri tongti
shilem agiba angutsü.

2021 ya Satyajit Ray sor
küm 100 ajungba küm alitsü.
Ray-i classic movie talisa "The
Apu Trilogy, "Charulata",
"Agantuk" aser "Nayak" tem
yangluba alima jangjaa lir.



Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND, INDIA

E-mail : abamimpur7@yahoo.co.in

Website : www.abamimpur.org

☎ : 0369-2262202 (O)

Dated Impur the May 29, 2021

CONDOLENCE MESSAGE

Er. Alangba Longchar asüba osang angashia aoksar aser
temulung shiranga bilemer, saka Tsüngremer sentong dak alema
asen meimchirtemi kecha inyaktsü makok ta angateta temulung
süngzüker.

Late Er. Alangba Longchar, ya ABAM kisü jensü mapatem aika
nung teyarir tajung ka süa aruba nübu ka lir. Talisa pa tebu Late.
Longranok, Aonokpu tenüng nung pa aser adianutemi Impur
Mission Compound nung ki ka sütsü. Iba ki floor ka nung ABAM
staff kibong ka toktsütsü aser floor kaji Aonokpu Baptist Arogo
nüngdak nung amshitsü ta tangatetba nung tenla-a sütsür külen
Aonokpu Baptist Arogo ajanga ABAM nem agütsü. Iba ama mapa
tajung pa lenisüba nung inyaka toktsüogo. Pai mapa tajung inyaka
toktsübatem kodanga mamatsü.

Er. Alangba Longchar-i toktsür aoba kinungertem nem Tsüngremi
tesüneptsüba tashi agüjangma ta ABAM-i sarasademtsür.

Handwritten signature

Rev. Dr. Mar Pongener
Executive Secretary,
ABAM, Impur.

Jemimah-i 'Northern Superchargers' atema asayatsü

Mumbai, Monupii/May 29, 2021 (Agencies): UK nung July 21, 2021 nü nung tenzüksü aliba 'The Hundred' asayamung nung, India tsür cricket asayar tasen (batswoman) Jemimah Rodrigues-i Northern Superchargers atema asayatsü terenemba lir.

Tetsür aser tebur team ti ti (8 each) dena asayatsü aliba '100-ball tournament' nung arishi küm 20 tain Jemimah-i T20I skipper Harmanpreet Kaur, vice-captain Smriti Mandhana, opener Shafali Verma aser all-rounder Deepti Sharma nung den külemi asayatsü terenemba lir.

"The Hundred nung asayatsü asoshi yongyar. Iba asayamung ya ni atema tajangshiba tasen ka asütsü," ta Rodrigues-i BBC indang 'Stumped' podcast nung ashi.

"Yorkshire Diamonds atema ni asayaogo aser kü team Northern Superchargers lir. Ajiasünung, taoba mapang ni parnok den asayadanga lir. Lauren Winfield (captain)

lenisüba kübok onok asayatsü," ta Rodrigues-i shisem.

June 16, 2021 nungi Bristol nung England den one-off Test sülen, ODIs asem aser T20Is asayatsü atema India tetsür squad nung Rodrigues anioka liasü.

Tang, Jemimah ya Mumbai nung tanünga tetsür aser squad den külemi quarantine' nung mungdar. Team anaprongla ayamesoa maodang anogo 14 tashi quarantine'asütsü.

England World Cup to takok angula, Lauren Winfield-Hill-i Northern Superchargers team anir asayatsü terenemba lir. Iba team nung Australia tsür Alyssa Healy dena lir.

2019 küm Rodrigues, Kaur, Mandhana aser Sharma nung ya shibangtsür aliba - Kia Super League (KSL) nung dena liasü. KSL ya ECB indang domestic

T 2 0 tournament ka liasü aser iba ajanga Women's



Hundred tenzüksü lenmang lapoktsü.

Maneni, 'The Hundred', koba taoba küm alima ajunga asünga coronavirus wara tenokdanga ajanga anogo atsülangja liasü, iba asayamung July 21, 2021 nü nungi tenzükä asayatsü sentong lir. London nung iba asayamung tenzükä tetsür team ana - Oval Invincibles aser Manchester Originals tsünga asayatsü.

WTC Final: Ravindra Jadeja-i 'Team jersey' tasen sayu



Ravindra Jadeja-i Honibarnü fans dang India Test team indang jersey tasenba sayubo noksa nung angur.

New Delhi, Monupii/May 29, 2021 (Agencies): India nung all-rounder' Ravindra Jadeja-i Honibarnü fans dang India Test team indang jersey tasenba sayuogo. New Zealand team den World Test Championship (WTC) final asayaba mapang India cricket team-i iba jersey tasen semer asayatsü.

Jadeja-i Instagram sabang

ajanga iba jersey semer tangokba noksa ka den külemi 'Rewind to 90's #lovingit #india' ta olen ka lemsatop.

Jadeja, shiba Sydney Test nung batting asüba mapang jemtsüba raksaa, iba timtem ajanga surgery agitsüsa aküm aser imlaa ataba dang nungi mapang tali oaa surgery agiba yong külem team pur den England Test series nung pai masayatet.

Arishi küm 32 tain 'Saurashtra' all-rounder Jadeja-i WTC final nung shilem agitsü terenemba lir. Ano külen, aruya aliba England tour nunga India team nung Jadeja nübu amshitsü.

England tour metenzükdang, tang India cricket team pur hopta ana tashi quarantine' asütsü atema Mumbai nung mungdar.

Taoba mapang, England spinner Monty Panesar-i ashiba agi, züngsem 11 rongnung,

India-i Ravindra Jadeja aser Ravichandran Ashwin na anioka asayatsüla.

"India squad nung Jadeja aser Ashwin naprongla anioka asayadaksütsüla. Tang, alima nung tena ama cricket asayar tajung shinga mali. Asaya mapang tena tsünga tesendaktep tajung ayur aser kati ka yinya anatepaya asayar. Iba den külemi tenati jeretpera asayaba yinya jangratemtsüka lir," ta Panesar-i ashi.

June 18 nungi Ageas Bowl, Southampton nung asayatsü aliba WTC final nung India-i New Zealand team den asayatsü terenemba lir. June 02, 2021 nü India team pur UK atongtsü.

WTC final dak alaka, India Team-i ano August 4, 2021 nungi tenzükä Trent Bridge, Nottingham nung England den Test series pungo asayatsü sentong lir.

Tanünga 'IPL 2021' UAE nung asayatsü: BCCI

New Delhi, Monupii/May 29, 2021 (Agencies): Board of Control for Cricket in India (BCCI)-i Honibarnü (29.05.2021), VIVO Indian Premier League 2021 season indang tanünga match tem United Arab Emirates (U.A.E) nung asayatsü telemtetba agiogo.

Taküm India nung September aser October ita tsünga tsüngluruwa mongpu asadangshia IPL indang ayongzüksü BCCI-i lemtet.

Iba asayamung atema 'bio-bubble' temzüng takang liaka, asayatem dak iba tashidak

putettsü tenzükba sülen, May tetenzüklen iba League thitemja liasü.

Honibarnü, virtual ajanga Special General Meeting (SGM) agiba mapang, IPL tenzükshitsü atema BCCI züngsemtem bangjemtep. Iba telemtetba den bendenloksema, BCCI SGM-isa Office Ketdangpur tem dang, 'ICC T20 World Cup 2021' ayongzüksü aliba dak sendakba nung mapang atsülangtsü asoshi ICC den jembishinütsü asoshi maparen nüngloktsüogo.

Indian Premier League

indang tanünga asayatem September 18 mesüra 19, 2021 nungi tenzükshitsü asadangteter, kong hopta asem nung 'double-header' 10 tashi asayatsü asalentong yangludat.

Iba League tenzükshitsü atema anogo matongdang, India cricket team pur September 14 nü Manchester nung England den tatembangbuba Test match asayatsü aser tasüngnüji (September 15) team ajunga chartered flight ka nung UAE-i ayamesoa aotsü, koba "bubble ka nungi bubble" kati aoba inyakym ka ama alitsü.

Manipur kübok district 16 nung Khelo India Centre amenoktsü

New Delhi, Monupii/May 29, 2021 (Agencies): Union sports ministry-i Manipur kübok District 16 nung Khelo India Centre tem amenoktsü asoshi terenemba lir.

"State aser UTs ajak nung Khelo India Centres (KIC) tasen 1000 lapoktsü asoshi Sorkar indang mapatong shilem ama, Sports Ministry-i Manipur nung centre 16 lapoktsü sangdongogo. Taoba hopta State 7 nung centre tasen 143 shi lapoktsü melaba shilem nung Manipur dena lir," ta Manipur indang sports department-i ashi.

Manipur kübok iba centre amenoktsü aliba District 16 ji - Imphal East, Imphal West, Thoubal, Kakching, Chandel, Tengenpual, Bishnupur, Churhandpur, Pherzwal, Kangpokpi, Senapati, Ukhrul, Kamjong, Jiribam, Tamenglong aser Noney alitsü, ta sports department sangdong ajanga metetdaksü.

"State nung saisapong telemsa balala nung athlete nem alima jenjang den meneptepa training agütsütsü nükjidong yur,


taküm küm tetenzüklen sports ministry-i Khuman Lampak Sports Complex, Imphal nung Khelo India State Centre of Excellence (KISCE) lapoktsüogo," ta youth affairs aser sports, Manipur indang T. Phulen Meitei-i ashi.

"Manipur ajunga ayimjema District 16 nung Khelo India State Centre 16 lapokba ajanga, State nungi saispongertem tali dang jangjashitsü aser iba den külemi linük nem naroküm bener arutsü asoshi saisapong tsütsü sempet tajung alir aika asenoki anitettsü teimla tulu lir," ta Meitei-i shisem.

Imphal kübok lapoka aliba Khuman Lampak Sports Complex ya Khelo India State Centre of Excellence (KISCE) ama shim aser 2020 küm virtual sentong ka ajanga Union sports & youth affairs minister Kiren Rijiju-i iba centre lapokja liasü.

State 7 nung centre tasen 143 amenoktsü melaba densema, tang India ajunga nung KICs 360 tashi lapokogo. Item KICs ya State Sorkar den Sports Ministry longiemer lapoktsü.

Sushil Kumar police ket nung ayutsü court-i anogo pezü atsülangtsü



Sushil Kumar (File photo)

New Delhi, Monupii/May 29, 2021 (Agencies): Delhi Court kati Honibarnü, Olympic medal takok angusang, wrestler Sushil Kumar, shiba Chhatrasal Stadium nung arishi küm 23 tain wrestler ka tepsetba ken o dak sendakba nung pua lir, pa ano police ket nung ayutsü asoshi court-i anogo pezü atsülangtsüogo.

Kumar dang asüngdangyatsü atema, iba court ajanga pua alisang, Kumar ya police ket nung anogo trok ayutsü asoshi tetuyuba agütsü.

Court-i latettsüba anogo Honibarnü tembangba mapang, Sushil Kumar okadaki anir oa liasü.

"Ochi obendang nung ajemdaker maparen inyaka aotsü asoshi, applicant (Kumar)

ya ano police ket nung anogo pezü ayutsü tim ta obendang agütsür," ta Metropolitan Magistrate Mayank Goel-i ashi.

Police-i Sushil Kumar ya anogo tenet atema parnok ket nung ayutsü mepishia liasü

May 4 aser 5 aonung Sushil Kumar aser pa den külem yariteper temi wrestler Sagar Dhankar aser par medemer ana - Sonu aser Amit Kumar nung dak azük ama temulung meleme bilemer. Iba sülen, Sagar kanga mejungi yiruba ajanga pa taküm meküzmüktetti süadok.

May 23, 2021 nü Delhi kübok Mundka tesem nungi International wrestler Kumar den Ajay Kumar apu. Police nem mepudaksütsü atema Kumar ya hopta asem jungnüa jenshia senzüa liasü.

BILEMDANGANG

"Pei tia dak dang rangloker taküm alir jagi tangar memeneper."